

Njemački humanitarac Dirk Planert za "Avaz" Na carini u Zvorniku su mi rekli da je ovo Srbija

18/08/2013 13:24 by Administrator

Njemački novinar i humanitarac Dirk Planert doživio je neugodnosti i maltretiranje na carinskom terminalu u Zvorniku, gdje mu nije dopušteno da u Srebrenicu dostavi humanitarnu pomoć u vidu opreme za bolnicu i pekaru. No, od svega mu je, kako kaže, najteže bilo što su mu na carinskom terminalu poručili da je došao u Srbiju, a ne BiH!

Oduzeta roba

Planert, koji putem Humanitarne organizacije "Help Srebrenica" iz Dortmunda već duže dostavlja pomoć za ovaj grad u istočnoj Bosni, ispričao je za "Dnevni avaz" kako su mu na carini u Zvorniku dali do znanja da kamion sa 6,5 tona opreme neće pustiti u Srebrenicu. Na carini je, kaže, bio zadržan 35 sati.

- Prvo što nam je rečeno u inspekciji "Progres" u Zvorniku bilo je: Ovo je Srbija, ovo nije Bosna! Pitali su nas hoće li muslimani dobiti ovu pomoć. Bio sam primoran da ostavim dva ultrazvuka, deset kreveta za bolnicu, kolica za invalidne osobe, uređaje za pekaru, pa čak i igračke za djecu. Stalno su tražili neke razloge kako nam ne bi dopustili da kamion prođe za Srebrenicu. Tražili su da platim 650 eura za PDV, što sam i uradio, iako se radi o humanitarnoj pomoći - ogorčeno nam govori Planert.

Navodi da je zbog svega toga morala intervenirati Njemačka ambasada u Sarajevu te je, kako kaže Planert, uz pomoć nekih ljudi iz Parlamenta BiH te Mugdima Atića iz Beča deblokirana pomoć. Planert vjeruje da će u narednim danima moći svu robu koja mu je oduzeta prebaciti u Srebrenicu. Zahvalan je, kaže, i načelniku opštine Srebrenica Atamilu Durakoviću, koji je konstantno intervenirao u ovom slučaju.

Etničko razdvajanje

Planert nam je ispričao da je razgovarao s Nenadom Miloševićem, direktorom Doma zdravlja Srebrenica, odakle je nedavno otpušten jedini bošnjački ljekar dr. Nermin Džanić.

Â Â Kamion pomoći za Srebrenicu Â

- Pitao sam Miloševića želi li da ubuduće dobije potrebne krevete, uređaje i kolica za ovu bolnicu. Odgovorio je potvrdno, a onda sam mu rekao da će se to desiti tek kada se dr. Džanić vrati na posao. Rekao sam mu da neću pomagati bolnici koja provodi etničko razdvajanje ljudi i koja otpušta Bošnjake - kazao nam je Planer.

Kako nam je otkrio ovaj njemački humanitarac, Milošević mu je obećao da će razgovarati s Ministarstvom zdravlja RS te da će dr. Džanić za dvije sedmice biti ponuđen novi ugovor u Domu zdravlja Srebrenica.

Kovačević: Carinici radili po proceduri

Portparol Uprave za indirektno oporezivanje BiH Ratko Kovačević kazao je za "Avaz" da su carinici u Zvorniku, u skladu s procedurama, tražili potrebna odobrenja za robu koja, kako kaže, prema zakonu podliježe inspekcijskom nadzoru.

- Za robu koju su prevozili nije bilo odgovarajućih odobrenja sanitarnih inspekcija, zatim Agencije za lijekove BiH i drugih institucija. S druge strane, roba nije oslobođena od plaćanja PDV-a jer ona nije evidentirana na neku od humanitarnih organizacija - objasnio je Kovačević.

Izvor vijesti: Dnevni Avaz